

# Tarnimikkut nappaatilinnik nammineersinnaajunnaarsitsineq allatigullu pinngitsaaliissummik iliuuseqarneq pillugu Inatsisartut inatsisaat

## Kapitali 1

### *Inatsisip atuuffia*

§ 1. Tarnimikkut nappaatilinnik napparsimavimmut unitsitsineq- uninnganerup nalaanni katsorsartinnermilu nammineersinnaajunnaarsitsineq allatigullu pinngitsaaliissummik iliuuseqarneq, taamaallaat Dronning Ingridip Napparsimavissuani tarnimikkut nappaatilinnut immikkoortortaqaarfimmi-inatsimmi matumani maleruagassat naapertorlugit- pisinnaavoq.

*Imm. 2.* Pinngitsaaliissummik unitsitsineq imm. 1 apeqqutaatinnagu sinerissami peqqinnissaqarfiup immikkoortuini aallartinneqarsinnaavoq. Dronning Ingridip Napparsimavissuani tarnimikkut nappaatilinnut immikkoortortaqaarfimmi nakorsaanerup nakorsaq unitsitsisoq isumasioreerlugu unitsitsinissaq aalajangiivigissavaa. Nalinginnaasumik angallannikkut pissutsit ajoqusiinngippata, pinngitsaaliissummik unitsitsinerup kingorna nal. ak. 48-it qaangiutsinnagit napparsimasoq Dronning Ingridip Napparsimavissuanut nuunneqassaaq. Kapitali 6-imi pinngitsaaliinikkut iliuuserisinnaasatut taaneqartut, pinngitsaaliissummik unitsitsinermi atorneqarsinnaapput.

§ 2. Pinngitsaaliinikkut iliuuseqarneq- inatsit una naapertorlugu- paasissutisseereernikkut akuersisitseqqaarani iliuuseqarnertut paasineqassaaq, napparsimasut inatsisitigut inissisimanerat pillugu Inatsisartut peqqussutaanni kapitali 2 takuuk.

*Imm. 2.* Napparsimasut 15 inorlugit ukiullit imal. paasissutissinneqareernikkut akuersisinnaassuseqanngitsut, inatsit una tunngavigalugu makku pitsaaliorniarlugit ingerlaannaq iliuuseqarnissaq pisariaqarpat, angajoqqaatut oqartussaasumit, sinniisuutitamit imal. ilaquuttanit qaniginerusanit akuersissummik piniartoqaqqaassanngilaq:

- 1) imminut allanilluunniit timikkut peqqisutsikkulluunniit ajoqusiineq imal.
- 2) annikigisassaanngitsumik aserorterineq.

*Imm. 3.* Tamatuma kingorna angajoqqaatut akisussaassuseqartoq, sinniisuutitaq ilaquuttalluunniit qaniginerusat ilisimatinneqassapput.

*Imm. 4.* Napparsimasunut 15-it 18-illu akornanni ukiulinnut, isummerfiginninnerup kingunerisinnaasaanik paasinnissinnaassuseqanngitsutut peqqinnissakkut sullissisumit immikkut naliliivigineqartunut, napparsimasut pisinnaatitaaffii pillugit Inatsisartut peqqussutaat § 8 imm. 2 -3-lu aamma atuupput.

## Kapitali 2

### *Aalajangersakkat nalinginnaasut*

**§ 3.** Peqqinnissaqarfiup immikkoortuisa arlaannut unitsitsineq, uninnganeq katsorsaanerlu sapinngisamik napparsimasup nammineq piumassusaa naapertorlugu pissapput.

*Imm. 2.* Unitsitsinermut-, uninnganermut-, katsorsaanermilu siunertaq- taamatullu peqqissinerusinnaanerup ilimanaatigisinnaasaa pillugu, nakorsap napparsimasooq paasissutississavaa.

*Imm. 3.* Immikkoortortamut unittut tamarmik katsorsartinnissaasa pilersaarusioneqartarnissaa, pilersaarutit suunerinik ilitersorneqarnissaat kiisalu pilersaarutit piviusunngortinnissaanut tamatigut akuersisinniarnissaat, Dronning Ingridip Napparsimavissuani tarnimikkut nappaatilinnut immikkoortortaqaqfimmil nakorsaanerup akisussaaffigaa.

*Imm. 4.* Katsorsaanermut pilersaarutit nutartertuagassaapput tamatigullu katsorsaanerit suut ingerlanneqarnerinut, kiisalu katsorsaanermi anguniagassatut suut siunniunneqarnerinut takussutissaassallutik.

*Imm. 5.* Katsorsagassaaq akerliliingippat, katsorsaanermut pilersaarutit assilinera, inuttaanut tunniunneqassaaq.

**§ 4.** Napparsimasup nammineq piumassutsi naapertorlugu peqataanissaa sapinngisaaq tamaat anguniaqqaarlugu aatsaat pinngitsaaliisummik iliuuseqartoqarsinnaavoq. Periarfissaqarpat napparsimasooq naammaginarumik piffissalerlugu eqqarsarfissinneqassaaq.

*Imm. 2.* Pinngitsaaliilluni iliuuseqarneq anguniagaasumut naapertuutuussaaq. Annikinnerusumik iliuuseqartoqarsinnaappat taanna toqqarneqassaaq.

*Imm. 3.* Pinngitsaaliineq sapinngisaaq tamaat qajassuartumik napparsimasumullu innarliinertaqanngitsumik ajoqusiinertaqanngitsumillu ingerlanneqassaaq.

*Imm. 4.* Pinngitsaaliineq siunertarisaq anguniarlugu pisariaqartitsinermi annertunerusumik atorneqassanngilaq.

## Kapitali 3

### *Nammineersinnaajunnaarsitsineq*

### *Aalajangersakkat nalinginnaasut*

**§ 5.** Napparsimasooq tarnimigut nappaateqarpat imal. tamatumunnga assingulluinnartumik ersiuteqarpat, katsorsartinnissaalu siunertarlugu nammineersinnaajunnaarsitsinnginneq illersorneqarsinnaanngippat aatsaat, §§ 6-8 naapertorlugit pinngitsaaliisummik unitsitsisoqarsinnaavoq imal. § 9 naapertorlugu tigummigallagassanngortitsisoqarsinnaavoq makku pissutigalugit:

1) ajorunnaarsinnaanerup imal. annertuumik pingaarutilmillu nappaatit pitsanngoriaateqarsinnaanera akornuserneqangaatsiarsinnaappat imal.

2) napparsimasooq imminut allanilluunniit annertuumik navianartorsiortitsisinnaappat.

### *Pinngitsaaliisummik unitsitsineq*

**§ 6.** Napparsimasup tarnimigut nappaateqarsorinartup nammineq katsorsartinnissi isumaginngippagu, qanigisaasut peqqinnissaqarfimmut attaveqarnissaaq pisussaaffigaat. Qanigisaasut peqqinnissaqarfimmut attaveqanngippata politiit taamaasiornissamut pisussaaffeqarput.

*Imm. 2.* Nakorsap tarnimikkut nappaatilinnut immikkoortortaqaqfimmut unitsitaanissap pisariaqassusaa,

misissuineq paasissutissallu pissarsiarineqartut tunngavigalugit naliliivigissavaa. Napparsimasoq paasissutissinneqarnikkut unitsitaanissamut akuersissuteqanngippat, pinngitsaaliisummik unitsitaanissap pisariaqassusaa nakorsamit aalajangiivigineqassaaq.

*Imm. 3. § 5-imi piumasaqaatit eqquutsinneqarpata pinngitsaaliisummik unitsitsisoqassaaq. § 7 imm. 2 naapertorlugu nakorsaq uppersaasiussaaq.*

**§ 7.** Pinngitsaaliisummik unitsitsinissaq pillugu politiit aalajangersaallutillu ikiutissapput.

*Imm. 2. Unitsitsinissaq siunertaralugu nakorsap nammeneq misissuineranut atatillugu uppersaasat tunngavigalugu, aatsaat pinngitsaaliisummik unitsitsisoqassaaq. Uppersaasat nakorsamit- Dronning Ingridip Napparsimavissuani tarnimikkut nappaatilinnut immikkoortortaqaarfimmi pinngitsaaliisummik unitsitaaffissami atorfilimmit- suliaassanngilaq. Taamatuttaaq nakorsaq nammeneq soqutigisat pissutigalugit aalajangeeqataasinnaanngitsoq uppersaasiortuussanngilaq. Nammeneq soqutigisat pissutigalugit aalajangeeqataasinnaannginneq pisortat ingerlatsineranni suliaassat suliarineqartarnerat pillugu Inatsimmi § 3-mi aalajangersakkatut atuuppoq.*

*Imm. 3. § 5 nr. 2 naapertorlugu pinngitsaaliisummik unitsitsineq, ullup unnuallu ataatsip ingerlanerani nakorsap misissuisimanerani tunngaveqassaaq, § 5 nr. 1-ilu naapertorlugu pinngitsaaliisummik unitsitsineq, sapaatip akunnerata kingulliup ingerlanerani misissuineramik tunngaveqassalluni.*

**§ 8.** § 5 nr. 2 naapertorlugu pinngitsaaliisummik unitsitsinermit napparsimasoq ingerlaanaq peqqinnissaqarfimmit unitsinneqassaaq. § 5 nr. 1 naapertorlugu- § 7 imm. 3-mi taaneqartutut- sapaatip akunnera ataaseq piffissaliussap iluani piaarnerpaamik pinngitsaaliisummik unitsitsisoqassaaq.

*Imm. 2. Pinngitsaaliisummik unitsitsinissamut piumasaqaatit eqquutsinneqarnerat, Dronning Ingridip Napparsimavissuani tarnimikkut nappaatilinnut immikkoortortaqaarfimmi nakorsaanerup aalajangiivigissavaa.*

*Imm. 3. Kalaallit Nunaanni politimesterip Qallunaat Nunaannilu Inatsisunik Atuutsitsinermit Ministereqarfiup akuersisinnerisigut, pinngitsaaliisummik unitsitsinissamut atatillugu politiit peqataanissaat, Naalakkersuisut immikkut maleruagassiuutissavaat.*

#### *Tigummigallagassanngortitsineq*

**§ 9.** Nakorsaanerup § 5-imi aalajangersakkat eqquutsinneqarsorippagit, Dronning Ingridip Napparsimavissuani tarnimikkut nappaatilinnut immikkoortortaqaarfimmi uninngasumik pinngitsaaliisummik tigummigallagassanngortitsisoqarsinnaavoq.

*Imm. 2. Tarnimikkut nappaatilinnut immikkoortortaqaarfimmi uninngasoq paasissutissinneqarnikkut akuersissuteqanngitsoq, immikkoortortamut matoqqasumut nunatta avataaniittumut nuunneqassappat, pinngitsaaliinikkut tigummigallagassanngortitsinermit atatillugu aalajangersakkat tunngavigineqassapput.*

*Imm. 3. Dronning Ingridip Napparsimavissuani tarnimikkut nappaatilinnut immikkoortortaqaarfimmi uninngasumit angerlarnissaq noqqaassutigineqarpat, noqqaassuteqarnermiit piaarnerpaamik kingusinnerpaamillu nal. ak. 24 it qaangiutsinnagit angerlartitaasinnaaneq imal. pinngitsaaliisummik tigummigallagassanngortinneqarnissaq pillugu, napparsimasoq nakorsaanermit nalunaarfigineqassaaq. Dronning Ingridip Napparsimavissuani tarnimikkut nappaatilinnut immikkoortortaqaarfimmut pinngitsaaliisummik unitsitaanermit imal. § 1 imm. 2 naapertorlugu unitsitaanermit ullup unnuallu ataatsip ingerlanerani angerlartitaanissaq noqqaassutaappat, pinngitsaaliisummik unitsitaanermit nal.*

ak. 48-it qaangiutsinnagit, nakorsaanerup aalajangiussaa napparsimasumut nalunaarutigineqassaaq. §§ 30-37 naapertorlugit napparsimasumut siunnersorti qinnuteqartuuppat taannattaaq ilisimatinneqassaaq.

*Takkutinngitsoortunik/qimaasunik pinngitsaaliisummik utertitsineq*

**§ 10.** § 1 imm. 2 naapertorlugu pinngitsaaliisummik unitsitaq tigummigallagassanngortitarluunniit, Dronning Ingridip Napparsimavissuani tarnimikkut nappaatilinnut immikkoortortaqaarfimmiit sinerissamiluunniit peqqinnissaqarfiup immikkoortuisa arlaanniit qimaasimappat namminerlu piumassutsiminik utersimangippat, politiit ikiorsiullugit utertinneqarnissaa, Dronning Ingridip Napparsimavissuani tarnimikkut nappaatilinnut immikkoortortaqaarfimmi nakorsaanerup aalajangiivigisinnaavaa. Takkutinngitsoornerup paasineqarneraniit sapaatip akunnera qaangiutsinnagu utertitsisoqarsinnaavoq. Pineqartoq anisinnaatitaanermiut atatillugu takkutinnitsoorpat, unnuinerit pingasut sinnerneqannginnissaannik akuersissuteqartoqarsimanissaa pinngitsaaliisummik utertitsinissamut piumasaqaataavortaaq.

*Imm. 2.* Kalaallit Nunaanni politimesterip Qallunaat Nunaannilu Inatsisinik Atuutsitsinermut Ministereqarfiup akuersisinnerisigut, pinngitsaaliisummik utertitsinissamut atatillugu politiit peqataanissaat, Naalakkersuisut immikkut maleruagassiuussinnaavaat.

*Nammineersinnaajunnaarsitsinerup atorunnaarsinneqarnera*

**§ 11.** § 5 naapertorlugu piumasaqaataasut eqquutsinneqarsinnaajunnaarpata, nammineersinnaajunnaarsitsineq ingerlaannaq atorunnaarsinneqassaaq. Napparsimasooq napparsimasumullu siunnersortaasooq ingerlaannaq tamatuminnga ilisimatinneqassapput.

**Kapitali 4**

*Pinngitsaaliisummik iliuuseqarneq*

**§ 12.** § 9 naapertorlugu pinngitsaaliisummik tigummigallagassanngortitaanissamut piumasaqaatit eqquutsinneqarpata aatsaat pinngitsaaliisummik iliuuseqartoqarsinnaavoq.

*Imm. 2.* Pinngitsaaliisummik nakorsaatitortitsinermi nakorsaatit misilerarneqareersut nalinginnaasumik annertussusilikkat annikinnerpaanillu kingunerluutitalit atorneqassapput.

*Imm. 3.* Pinngitsaaliisummik iliuuseqarneq taamaallaat Dronning Ingridip Napparsimavissuani pisinnaavoq.

*Imm. 4.* Imm. 1-imi piumasaqaatit eqquutsinneqarpata napparsimasullu inuunera navianartorsiorpat navianartorsiortinneqalersinnaappalluunniit aatsaat pinngitsaaliisummik qupinnguallatsitsilluni katsorsaasoqarsinnaavoq.

*Imm. 5.* Pinngitsaaliisummik iliuuseqarnissaaq Dronning Ingridip Napparsimavissuani tarnimikkut nappaatilinnut immikkoortortaqaarfimmi nakorsaanermit aalajangiivigineqassaaq. Katsorsaaniarnermut atatillugu pisariaqartinneqassappat napparsimasup qanoq annertutigisumik nukersorfigineqartariaqarnissaa, nakorsaaneruttaa aalajangiivigisinnaavaa.

*Imm. 6.* Imm. 4 naapertorlugu pinngitsaaliisummik iliuuseqartoqarnissaa pillugu nakorsaanerup aalajangiinissaa sioqullugu, napparsimasooq akuersissuteqarnissamut naammaginarumik piffissalerlugu eqqarsarfissinneqassaaq. Naammattumik- ullulli pingasut sinnernagit napparsimasooq eqqarsarfissinneqassaaq.

*Imm. 7. Aalajangersagaq naapertorlugu Naalakkersuisut pinngitsaaliisummik iliuuseqarneq pillugu immikkut maleruagassiussapput.*

**§ 13.** § 5 naapertorlugu nammineersinnaajunnaarsitsisinaanermut piumasaqaatit eqquutsinneqarpata, napparsimasorlu inuunera peqqissusaaluunniit nappaammit annertuumik navianartorsiortinneqartoq, paasissutissinneqarnikkut timikkut nappaammi nakorsarneqarnissaanut akuersissuteqanngippat, pinngitsaaliisummik nakorsarneqarsinnaavoq. Napparsimasoq Dronning Ingridip Napparsimavissuani tarnimikkut nappaatilinnut immikkoortortaqarfimmi uninnganngippat, aalajangersagaq naapertorlugu pinngitsaaliisummik nakorsaasoqartinnagu, § 6 imm. 3 naapertorlugu pinngitsaaliisummik unitsitaanissamut uppersaasiortoqaqqaarnissaa, tarnimikkullu nappaatillit immikkoortortaqarfianni nakorsaanerup § 8 imm. 2 naapertorlugu pinngitsaaliisummik unitsitsinissamut piumasaqaatit eqquutsinneqarnerannik aalajangiinissaa, piumasaqaataapput.

*Imm. 2. Imm. 1-imi taaneqartutut pinngitsaaliisummik iliuuseqarnissaaq, Dronning Ingridip Napparsimavissuani tarnimikkut nappaatilinnut immikkoortortaqarfimmi nakorsaaneq isumasioqatigereerlugu, timikkut nappaatinut immikkoortortaqarfimmi pineqartumi nakorsaanermit aalajangiivigineqassaaq. Pisariaqassappat nakorsartinneq timikkut nappaatilinnut immikkoortortaqarfimmi ingerlanneqarsinnaavoq.*

*Imm. 3. Aalajangersagaq naapertorlugu pinngitsaaliisummik nakorsaaneq pillugu Naalakkersuisut immikkut maleruagassiussapput.*

## Kapitel 5

### *Angerlartitsinermit atatillugu malittarinneq*

**§ 14.** Napparsimasut angerlartitaanermik kingorna peqqissutsimut pisariaqaatilimmik, namminneq piumassusertik naapertorlugu katsorsartinnissamik inunnilluunniit isumaginninnikkut ikiorserneqarnissamik noqqaassuseqarsinnaasorinngisat, napparsimasup, tarnimikkut nappaatilinnut immikkoortortaqarfup kiisalu pisortaqarfiit sullissinissamut naapertuuttut, peqqinnissakkut sullissisut allallu akunnerminni katsorsaanikkut isumaginninnikkullu neqeroorutit pillugit isumaqatigiissusiornissaat, Dronning Ingridip Napparsimavissuani tarnimikkut nappaatilinnut immikkoortortaqarfimmi nakorsaanerup akisussaaffigaa.

*Imm. 2. Angerlartitaanermut atatillugu isumaqatigiissutinik nalunaarsuinissaaq Nunatsinnilu Nakorsaanermut nalunaarutiginnittarnissaaq Naalakkersuisunit maleruagassiuunneqassaaq. Nalunaarutiginnittarnermut atatillugu napparsimasup kinaassusaata ilanngunneqartarnissaa pillugu Naalakkersuisut maleruagassiorsinnaapput.*

**§ 15.** Napparsimasoq § 14 –mi aalajangersakkat naapertorlugit pineqartoq, angerlartitaanermut atatillugu isumaqatigiissusioqataajumanngippat, tarnimikkut nappaatilinnut immikkoortortaqarfup- pisortaqarfiit sullissinissamut naapertuuttut, peqqinnissakkut sullissisut taamaaqataalu suleqatigalugit- peqqinnissakkut isumaginninnikkullu neqeroorutinik ataqatigiissaaralutik napparsimasup pilersaarusiunnissaa, nakorsaanerup akisussaaffigaa.

*Imm. 2. Pilersaarusianik ataqatigiissaakkanik nalunaarsuinissaaq Nunatsinnilu Nakorsaanermut nalunaarutiginnittarnissaaq pillugu Naalakkersuisut maleruagassiussapput. Nalunaarutiginnittarnermut atatillugu napparsimasup kinaassusaata ilanngunneqartarnissaa pillugu Naalakkersuisut maleruagassiorsinnaapput.*

**§ 16.** Paasissutissanik ingerlatsitseqqinneq angerlartitaanermut atatillugu isumaqatigiissutit ataqatigiissaakkamilluunniit pilersaarusiap eqquutsinneqarneranik nakkutilliinermut atatillugu pisariaqartutut isigineqarpat, tarnimikkut nappaatilinnut immikkoortortaqarfik paasissutissanik napparsimasup inuttut inuuneranun tunngasunik pisortaqarfinnut, peqqinnissakkut sullissisunut taamaaqataannullu ingerlatitseqqissinnaavoq. Taamatuttaaq pisortaqarfiit, peqqinnissakkut sullissisut assigisaallu paasissutissanik napparsimasup inuttut inuuneranun tunngasunik, tarnimikkut nappaatilinnut immikkoortortaqarfimmut, pisortaqarfinnut allanut, peqqinnissakkut sullissisunut assigisaannullu ingerlatitseqqissinnaapput.

**§ 17.** Angerlartitaanerup kingorna katsorsartinnermik peqqissutsip attatsiinnarnissaanut pisariaqartumik napparsimasup taamaatsitsinissaa tunngavissalimmik ernumanaateqartoq ilimanaateqarlunnartorlu uninnganerup nalaani paasinarsippat, kiisalu:

- 1) uninnganeq sioqqullugu ukiut pingasut kingulliit ingerlaneranni napparsimasoq pinngitsaaliisummik unitsitaasimappat pinngitsaaliisummilluunniit tigummigallagassanngortitaasimappat
- 2) uninnganeq sioqqullugu ukiut pingasut kingulliit ingerlanerini, napparsimasup minnerpaamik ataasarluni angerlartitaanermut atatillugu isumaqatigiissummi pilersaarummilluunniit ataqatigiissaakkami katsorsartinnissamut pilersaarutaasumik malinnissimanngippat, kiisalu
- 3) napparsimasoq pinngitsaaliisummik unitsitaasimappat pinngitsaaliisummilluunniit tigummigallagassanngortitaasimappat napparsimasup angerlartinneqannginnerani pinngitsaaliisummik malittarinninnissaq, Dronning Ingridip Napparsimavissuani nakorsaanerup aalajangiivigisinnaavaa.

*Imm. 2.* Angerlartitaanermut atatillugu pinngitsaaliisummik malittarinninnissaq pillugu nakorsaanerup aalajangiinera, peqqinnissaqarfiup immikkoortuisa arlaannut ornigunnikkut nakorsaatitortsinneqarnissaannarmik piumasaqaateqarfiusinnaavoq.

*Imm. 3.* Napparsimasoq nakorsaatitortitassaq takkutinngitsoorpat politiit ikiortigalugit aaneqarnissaa pinngitsaaliisummillu peqqinnissaqarfiup immikkoortuisa arlaanni nakorsaatitortinneqarnissaa, nakorsaanerup aalajangiivigisinnaavaa. Napparsimasumik aallernermin sapinngisaq tamaat peqqinnissakkut sullissisumik peqataasoqassaaq.

*Imm. 4.* Angerlartitaanermut atatillugu pinngitsaaliisummik malittarinnilluni nakorsaasiinermi, nakorsaatit napparsimasumut qanoq sunniuteqarneri nakorsaanermit ilisimaneqartut- pisariaqarpallu sivirusumik sunniusimasinnaasut atorineqassapput.

*Imm. 5.* Angerlartitaanermut atatillugu pinngitsaaliisummik malittarinninnissamik aalajangiineq angerlartitaareernerup kingorna qaammatini pingasuni atuutsinneqarsinnaavoq.

*Imm. 6.* Napparsimasup imm. 5 naapertorlugu qaammatit pingasut killiliussat qaangiunneranni, piqqissutsiminut pingaarutilimmik katsorsartinnerminik taamaatsinissaanut annilaanngateqarnissaq taamalu pisoqarsinnaanerani ilimasuuteqarnissaq tunngavissaqarpat, angerlareernermin pinngitsaaliisummik malittarinninnerup qaammatit pingasukkaarlugit, qaammatilli aqqaneq marluk sinnernagit sivitsorneqartarnissaa, nakorsaanerup aalajangiivigisinnaavaa.

**§ 18.** Napparsimavimmiit angerlartitaanermut atatillugu pinngitsaaliisummik malittarinninnissaq, tassungalugu atatillugu napparsimasumik nakorsaatitortinneqarnissamut nammineq piumassutsiminik takkutinngitsumik politiit aallersinnaanerani pillugu, Kalaallit Nunaanni politimesterip Qallunaat Nunaannilu Inatsisinik Atortitsinermut Ministereqarfiup akuersinerisigut- taamatuttaaq peqqinnissakkut sullissisumik peqataasoqarnissaa pillugu, Nalakkersuisut maleruagassiussapput.

## Kapitali 6

*Aalaakkiineq assigisaanillu iliuuseqarneq.*

*Aalaakkiineq*

**§ 19.** Pinngitsaaliisummik aalaakkiinermi taamaallaat qitequt, singernernut aamma imal. paffinnut aalaakkiissutit aqqatillu atorneqarsinnaapput.

*Imm. 2.* Pinngitsaaliilluni aalaakkiisoqarsinnaavoq makku pitsaaliornissaat pisariaqarpat:

- 1) napparsimasup nammineq allallu timaannik peqqissusaannillu ajoqusiisinaanera ilimanaateqarlunnarpat,
- 2) napparsimasooq uninngaqqammik malersuippat allatulluunniit annertuumik ajoqusersuippat imal.
- 3) annikigisassaanngitsumik aserorterippat.

**§ 20.** Nakorsap napparsimasumik takuniaareernerme kingorna pinngitsaaliisummik aalaakkiinissaq aalajangiivigissavaa.

*Imm. 2.* Qiterut atorlugu aalaakkiinerup saniatigut paffinnut aamma imal. singernernut aalaakkiissutit aqqatillu atorneqarnissaat, Dronning Ingridip Napparsimavissuani tarnimikkut nappaatilinnut immikkoortortaqarfimmi nakorsaanerup aalajangiivigissavaa.

*Imm. 3.* Sinerissami peqqinnissaqarfiup immikkoortuisa arlaanni pinngitsaaliisummik aalaakkiineq nal. ak. aqqaneq marluk sinnerlugit sivisussuseqassappat sivisussuseqassangatinneqarpalluunniit, aallaakkigaanerup sivitsorneqarnissaa, Dronning Ingridip Napparsimavissuani tarnimikkut nappaatilinnut immikkoortortaqarfimmi nakorsaanerup aalajangiivigissavaa.

*Imm. 4.* § 19-imi imm. 2 nr. 1-imi taaneqartutut pisoqarnerani nakorsap takkunnissaanut utaqqinissaq napparsimasumut allanulluunniit isumannaallisaaneq eqqarsaatigalugu illersorneqarsinnaanngippat, sulisut namminneq napparsimasooq qiteruserlugu aalaakkernissaa aalajangersinnaavaat. Taamaa pisoqarpat nakorsaq qiterusiilluni aalaakkiineq pillugu aalajangiisuusussaq ingerlaannaq aggersarneqassaaq.

**§ 21.** Napparsimasooq qiteruserlugu aallaakkigaaq immikkut nakkutilliisoqartinneqassaaq.

*Nukersorfiginninneq*

**§ 22.** Napparsimasooq peqqinnissaqarfiup immikkoortuisa arlanni uninngasooq § 19 imm. 2-mi piumasaqaatit eqquutsinneqarpata, pinngitsaaliisummik aalaakkerneqarsinnaavoq pisariaqarpallu nukersorfigalugu sumiiffimmi immikkoortumut allamut nuutinneqarsinnaalluni. Napparsimasut kapitali 3 naapertorlugu nammineersinnaajunnaarsitaasimasut immikkoortortamiiginnarnissaat qulakkeerniarlugu nukersorfigisariaqarsinnaapput.

*Imm. 2.* Napparsimasup nappaanni pissutigalugu eqqissiveeqisup pitsaanerulernissaanut aalajangiisuuppat- pisariaqarpat nukersornikkut- eqqissisaammik kapineqarnissaa nakorsap aalajangersinnaavaa.

*Napparsimasumik illersuiniarluni aalaakkiineq*

**§ 23.** Napparsimasooq illersorniarlugu aalaakkiineq tassaavoq qanorluunniit iliuuseqarnikkut napparsimasup piumassuserinngisamik imminut annertuumik navianartorsiortissinnaaneramik pitsaaliuineq.

*Imm. 2. Nakorsap napparsimasumik takuniaareerluni suna atorlugu aalaakkiisoqarnissaa aalaajangereerpagu aatsaat napparsimasumik illersuiniarluni aalaakkiisoqarsinnaavoq.*

*Immikkut nakkutilliineq immikkoortortamilu matunik parnaarsineq*

**§ 24.** Inatsit naapertorlugu immikkut nakkutilliineq tassaavoq sulisup ataatsip marluluunniit nappasimasumit nigoratik nakkutilliisinneqarnerat.

*Imm. 2. Makku pitsaaliniarlugit pisariaqarpat aatsaat napparsimasup akuersissutigisimanngisaanik immikkut nakkutilliisoqarsinnaavoq:*

- 1) imminorneq imal. nammineq allalluunniit peqqissusaannik annertuumik ajoquusiinnaaneq imal.
- 2) napparsimasoq uninngaqqamminik malersuippat allatulluunniit annertuumik ajoqusersuippat

*Imm. 3. Immikkut nakkutilliisoqarnissaa nakorsap napparsimasumik takusaareernermi kingorna aalajangiivigissavaa.*

**§ 25.** Napparsimasoq immikkoortortamut unitsinneqarnermini immikkoortortap aaqqissuussaananik-taamaattoqassappallu immikkut parnaarneqarsinnaasumik immikkoortortaqarnera ilanngullugu-ilisimatinneqassaaq.

**§ 26.** Napparsimasut inaannut matut pinnagit, immikkoortortami napparsimasunut makkununga matunik parnaarsinissaq nakorsamit aalajangiivigineqarsinnaavoq:

- 1) kapitali 3 naapertorlugu nammineersinnaajunnaarsitat kiisalu
- 2) napparsimasut § 23 naapertorlugu piumassuserinngisaminnik imminnut annertuumik navianartorsiortissinnaasut.

*Imm. 2. Napparsimasut inaannut matut pinnagit, napparsimasut imm. 1- imi pineqanngitsut namminneq kissaatigippassuk matunik parnaarsinissaq, nakorsap aalajangiivigisinnaavaattaq. Napparsimasup kissaataa naapertorlugu ingerlaannaq matut parnaarussaarneqassapput.*

*Imm. 3. Imm. 1 aamma 2 naapertorlugit matunik parnaarsinissaq aalajangiunneqarniariarpat, napparsimasut immikkoortortami uninngasut tamarmik tamatuminnga kalerrinneqassapput.*

*Pinngitsaaliisummik timikkut eqqiluisaartitsineq*

**§ 27.** Tarnimigut nappaatilik nappaanni pissutigalugu timikkut eqqiarnissaminik isumaginnissinnaanngitsoq- napparsimasoq nammineq uninngaqaataasut sulisulluunniit eqqarsaatigalugit pisariaqarpat- pinngitsaaliisummik eqqiartsinneqarnissaa pillugu, Dronning Ingridip Napparsimavissuani tarnimikkut nappaatilinnut immikkoortortaqarfimmi nakorsaaneq aalajangiisinnaavoq.

*Pisinnaatitsineq pillugu aalajangersagaq*

**§ 28.** Pinngitsaaliisummik aalaakkiineq, nukersorfiginninneq, napparsimasoq illersorniarlugu aalaakkiineq, immikkut nakkutilliisoqartitsineq, immikkoortortami matunik parnaarsineq pinngitsaaliisummillu timikkut eqqiartitsineq pillugu, Naalakkersuisut immikkut maleruagassiuussissapput

## **Kapitali 7**

*Allakkanik, ininik napparsimasut uninngaviinik pigisaannillu misissuineq, timi satsillugu misissuineq pigisanillu arsaarinninneq suujunnaarsitsinerlu*

**§ 29.** Nakorsaatit, aanngajaarniutit atortulluunniit navianaatillit napparsimasumut apuunneqarsimanerannik apuunniarneqarnerannilluunniit tunngavissalimmik pasitsaassisoqartillugu, Dronning Ingridip Napparsimavissuani tarnimikkut nappaatilinnut immikkoortortaqaarfimmi nakorsaanerup makku aalajangiivigisinnaavai:

- 1) napparsimasup allagarsiaasa/nassiussarsiaasa ammarneqarlutik misissuivigineqarnissaat,
- 2) inip napparsimasup uninngaviata napparsimasullu pigisaasa misissorneqarnissaat imal.
- 3) napparsimasup timaa satsillugu misissorneqarnissaa. Timip ammarnisa misissorneqarnissaat inerteqqutaavoq.

*Imm. 2.* Napparsimasup allagarsiaasa/poortugarsiaasa, inip uninngaviata pigisaasalu misissorneqarnerini sapinngisamik napparsimasoq peqataatinneqassaaq.

*Imm. 3.* Nakorsaatit, aanngajaarniutit atortullu navianaatillit imm. 1 naapertorlugu iliuuseqarnermi nassaarineqartut arsaarinnissutaanissaat, nakorsaanermit aalajangiivigineqarsinnaavoq. Nakorsaatit, aanngajaarniutit atortullu navianaatillit inatsisit nalinginnaasut unioqqutillugit pigineqarnersut, nakorsaanerup politiinut aalajangigassanngortissinnaavaa.

*Imm. 4.* Allagarsianik/nassiussarsianik, ininik napparsimasut uninngaviinik pigisaannillu -napparsimasullu timaa satsillugu misissuisarneq kiisalu atortunik arsaarinnittarneq suujunnaarsitsisarnerlu pillugit, Naalakkersuisut immikkut maleruagaassiussapput.

## **Kapitali 8**

*Pinngitsaaliinernik nalunaarsuisussaataaneq pinngitsooranilu pinngitsaalisat malinnaaffigalugit naliliinissaaq*

**§ 30.** §§ 5-10 naapertorlugit pinngitsaaliinikkut iliuutsinik suugaluanik ilisimatitsineq, § 12, § 17 naapertorlugu napparsimavimmiit angerlartitamik pinngitsaaliisummik malittarinninneq, §§ 19 – 22, § 23 naapertorlugu iliuusissatut innersuussutit, § 24 naapertorlugu nal. ak. 24 sinnerlugit immikkut nakkutilliineq, kiisalu § 26 pinngitsaaliilluni iliuutsit suuneri tunngavilersuutaasullu immikkoortortami nalunaarsuivimmut nalunaarneqassapput.

*Imm. 2.* Pinngitsaaliinikkut iliuutsinik nalunaarsuineq Nunatsinnilu Nakorsaanermit nalunaaruteqartarnissaq pillugu Naalakkersuisut immikkut maleruagassiussapput. Tamatumunnga atatillugu nalunaarutit napparsimasup kinaassusaanik ilaqartinneqarnissaat pillugu Naalakkersuisut maleruagassiorsinnaapput.

**§ 31.** Nammineersinnaajunnaarsitsinerup, pinngitsaaliisummik iliuuseqarnerup, angerlartitaareermermi pinngitsaaliisummik malittarinninnerup, pinngitsaaliisummik aalaakkiinerup, nukersorfiginninnerup, napparsimasoq illersorniarlugu aalaakkiinerup, matunik parnaarsinerup, pinngitsaaliisummik timikkut eqqartitsinerup, allagarsianik/nassiussarsianik- napparsimasup inigisaanik pigisaanillu misissuinerup, timi satsillugu misissuinerup kiisalu nakorsaatinik allanillu arsaarinninnerup pisariaqartitamiit annertunerusumik atorineqannginnissaanik nakkutilliineq, Dronning Ingridip Napparsimavissuani tarnimikkut nappaatilinnut immikkoortortaqaarfimmi nakorsaanerup pisussaaffigaa.

*Imm. 2.* Nammineersinnaajunnaarsitsinerup naliliiviginissaanut atatillugu ullut pingasut, qulit, 20-it 30-illu qaangiunnerini tamatumalu kingorna akuttunerpaamik sap. ak. sisamat qaangiunnerini, nammineersinnaajunnaarsitsinerup atorunnaarsinnissaata tungaanut, piumasaqaatit eqquutsinneqarnerat nakorsaanerup nakkutigisassara. Naliliinerit taakku pinngitsaaliisummik iliuutsinut nalunaarsuivimmut ilanngunneqassapput.

*Imm. 3.* Nammineersinnaajunnaarsitsinerup attatiinnarnissaanik aalajangiineq pillugu napparsimasooq napparsimasumullu siunnersorti nalunaarfigineqassapput.

*Imm. 4.* Napparsimasooq illersorniarlugu aalaakkiinerup attatsiinnarnissaa, pissutsit apeqqutaatillugit, akulikitsunik akuttunerpaamilli napparsimasumik illersuiniarluni aalaakkiinissap aalajangiunneqarneraniit ullut pingasut, qulit, 20-it 30-illu qaangiunnerini, tamatumalu kingorna sivitsorneqassappat, akuttunerpaamik sap. ak. sisamat qaangiunnerini nakorsaq nutaamik naliliissaaq.

*Imm. 5.* Pinngitsaaliisummik aalaakkiinerup attatsiinnarnissaa, pissutsit apeqqutaatsillugit, akulikitsumik akuttunerpaamilli ullup unnuallu ataatsip ingerlanerani, ataasiarluni nakorsamit nutaamik naliliivigineqassaaq.

## Kapitali 9

### *Napparsimasunut siunnersortit*

**§ 32.** Pinngitsaaliisummik unitsitat, tiggummigallagassanngortitat, pinngitsaaliisummik katsorsakkat, angerlartinneqarnerminnut atatillugu malittarineqartut, pinngitsaaliisummik aalaakkikkat, nukersorfigisat, napparsimasooq illersorniarlugu aalaakkikkat, nal. ak. 24-it sinnerlugit immikkut nakkutigisariillit kiisalu § 26 imm. 1 nr. 2 naapertorlugu immikkoortortami matut parnaarnerisigut mattunneqartut tamarmik siunnersorteqartinneqassapput.

*Imm. 2.* Peqqinnissaqarfup immikkoortuisa arlaanni unitsitaanermut, uninnganermut katsorsartinnermullu tunngasut suulluunniit pillugit napparsimasunut siunnersorti napparsimasumut ilitersuillunilu siunnersuisuussaaq. Napparsimasooq maalaaruteqarniarpat tamatuma suliaralugulu naammassineqarnissaanut siunnersorti ikiutissaaq. Napparsimasup maalaarutaata Tarnimikkut Nappaatillit Maalaarutaannik Aalajangiisartunit suliarineqarnerani, ajornanngippat siunnersorti peqataassaaq.

**§ 33.** Nunatta eqqartuussiviani eqartuussisooq qinnuteqartut akornanni napparsimasunut siunnersortissanik atorfinitsissaaq. Napparsimasunut siunnersortinngortut nalunaarsorsimaffiat, Dronning Ingridip Napparsimavissuani tarnimikkut nappaatilinnut immikkoortortaqaqfimmut nassuunneqassaaq. Napparsimasunut siunnersortinngortut Nuummi najugaqartuussapput Dronning Ingridillu Napparsimavissuani atorfeqartuussanatik.

*Imm. 2.* Pinngitsaaliisummik iliuuseqartoqarnerata siunnersortinngornerullu peqqissaasumit pigaartuusumit siunnersortinngortumut piaarnerpaamik nalunaarutigineqarnerisigut, siunnersortinngortitsisoqassaaq. Siunnersortinut nalunaarsuivimmi tullinnguuttoq napparsimasumut siunnersortinngortinneqassaaq.

*Imm. 3.* Siunnersortinngortsinniagaq pillugu oqaaseqaateqarnissamut napparsimasooq periarfissinneqassaaq. Nalunaarsuiffimmi allassimasumik allamik siunnersorteqarnissaaq napparsimasup kissaatigippagu, sapinngisaq naapertorlu kissaataa akuerineqassaaq. Aalajangiineq kredsdommerimut naammagittaalliutigineqarsinnaavoq.

*Imm. 4.* Napparsimasunut siunnersortit nalunaarsorsimaffianni allassimanngitsumik siunnersorteqarnissi napparsimasup kissaatigippagu, imm. 2 naapertorlugu nalunaarsuiffimmi tullinnguuttoq utaqiisaasumik siunnersortinngortinneqassaaq. Napparsimasup toqqagaata siunnersortinngorsinnaanera kredsdommerip aalajangiivigissava.

Napparsimasup kissaataa akornutissaqanngippat akuerineqassaaq.

**§ 34.** Napparsimasumut siunnersortinngortup napparsimasoq piaarnerpaamik pulaassavaa attaviguassallugulu. Napparsimasoq Dronning Ingridip Napparsimavissuaniippat, siunnersortinngornerup kingorna nal. ak. 24-it qaangiutsinnagit napparsimasoq siullermik pulaarneqassaaq. Napparsimasoq sinerissami peqqinnissaqarfiup immikkoortuisa arlaanniikkallarpat siunnersortinngornermiit nal. ak. 24-it qaangiutsinnagit oqarasuaatikkut attavigineqassaaq. Tamatuma kingorna sapinngisamik sapaatip akunneranut ataasiarluni pisariaqartitsinerlu naapertorlugu pulaartoqartassaaq.

*Imm. 2.* Akeqanngitsumik akornuserneqaranilu nammineq takkunnikkut, allakkatigut oqarasuaatikkullu napparsimasumut attaveqarsinnaaneq, napparsimasunut siunnersortip pisinnaatitaaffigaa.

**§ 35.** Ilisimasariaqagaq sunaluunniit suliassap illersorneqarsinnaasumik naammassineqarsinnaanissaanut pisariaqartoq, immikkoortortami/immikkoortumi sulisut napparsimasup siunnersortaanut ilisimatitsissutigissavaat. Nakorsamit napparsimasumut ilisimatitsissutaanngitsut taamatuttaaq napparsimasup siunnersortaannut ilisimatitsissutaassanngillaat.

**§ 36.** Pinngitsaaliineq taamaatinneqarpat siunnersortaaneq aamma taamaatitinneqassaaq. Napparsimasorli tamanna sioqqullugu peqatigisaanilluunniit maalaaruteqarpat, siunnersortaa tamatumunnga ikiutissaaq.

**§ 37.** Napparsimasunut siunnersortinik atorfinitsitsineq-, siunnersortissanngortitsinerq-, suliassaat-, pisinnaatitaaffii akissarsiaqartinneqarnerilu pillugit- Naalakkersuisut ersarinnerusunik maleruagassiussapput.

## **Kapitali 10**

*Ilisimatitsineq maalaaruteqarnissamut assigisaannullu ilitseruineq.*

**§ 38.** Nammineersinnaajunnaarsitsinialersinnani allatullu pinngitsaaliissummik iliuuseqarnialersinnani, pinngitsaaliissutip suunera, qanoq ittuunera, suna tunngavigalugu taamaasiortoqartariaqarnera siunertaasorlu pillugit, napparsimasoq ilisimatinneqaaqqaassaaq.

*Imm. 2.* Pisariaqarpat §§ 19-22 naapertorlugit ilisimatitseqqaarani tassaangaannaq pinngitsaaliissummik aalaakkiisoqarsinnaavoq nukersorfiginnitoqarsinnaallunilu. Tamatuma kingorna taamaasiortariaqarneq tunngavilersorneqassaaq.

**§ 39.** Pinngitsaaliissummik iliuuseqarfiginninnermut suugaluumut maalaarutiginnissinnaaneq pillugu, napparsimasoq ilitserorneqassaaq.

*Imm. 2.* Pinngitsaaliissummik iliuuseqarnissap aalajangiunneqarnera pillugu maalaarutit, Tarnimikkut Nappaatillit Maalaarutaannik Aalajangiisartut naliliinissaasa tungaanut, pinngitsaaliissummik iliuuseqarnissamut kinguartitsissutaasinnaanngillat.

*Imm. 3.* Napparsimasulli inuunera peqqissusaaluunniit annertuumik ajoquserneqaaqqunagu imal. napparsimasup nuit allat timaannik peqqissusaannillu ajoqusiisinnaanerata pitsaaliornissaanut pinngitsaaliissummik iliuuseqariataartoqartariaqanngippat, Tarnimikkut Nappaatillit Maalaarutaannik Aalajangiisartut naliliinissaasa tungaanut, Kapitali 4 naapertorlugu pinngitsaaliissummik iliuuseqarnissap aalajangiunneqarnera pillugu maalaaruteqarneq, pinngitsaaliilluni iliuuseqarniarnermut kinguartitsissutaasinnaavoq. § 17 naapertorlugu angerlartitaareernermi pinngitsaaliissummik malittarineqarnissamik aalajangiinnermut maalaaruteqarneq, pinngitsaaliilluni iliuuseqarniarnermut kinguartitsissutaasinnaavoq.

§ 40. Nalunaaruteqarneq- maalaaruteqarsinnaanermullu ilitersuineq pillugit Naalakkersuisut ersarinnerusunik aalajangersaassapput.

## Kapitali 11

### *Maalaaruteqarsinnaaneq eqqartuussivilersuussisinnaanerlu*

§ 41. Tarnimikkut Nappaatillit Maalaarutaannik Aalajangiisartunik taasamik, eqqartuussissuserisumik siulittaasoqartumik Nunatsinnilu Nakorsaanermit kiisalu napparsimasut ilaqutaasullu peqatigiiffianit tarnimikkut nappaatilinnut sinniisuutitaasumik ilaasortaafigineqartumik, Peqqissutsimut Naalakkersuisoq pilersitsissaaq. Ilaasortanuttaa sinniisussanik Peqqissutsimut Naalakkersuisoq toqqaassaaq. Toqqagaaneq ukiuni sisamani atuutsissaaq. Toqqagaasimasunik toqqaaqqittoqarsinnaavoq. Tarnimikkut Nappaatillit Maalaarutaannik Aalajangiisartut sulinerminni suliat ataasiakkaat suliarinissaannut aalajangiiviginissaannullu kiffaanngissuseqarput.

*Imm. 2.* Tarnimikkut Nappaatillit Maalaarutaannik Aalajangiisartut allatseqarnikkut Nunatsinni Nakorsaaneqarfimmit isumagineqassapput. Aalajangiisartut sulinerannut atatillugu aningaasartuutit akissarsiaqartinneqarnerat ilanngullugu, Peqqissutsimut Naalakkersuisoqarfimmit isumagineqassaaq.

§ 42. Napparsimasup siunnersortaataluunniit piumasaqarneragut pinngitsaaliisummik unitsitsineq, pinngitsaaliisummik tigummigallagassanngortitsineq, uninngavimmut utinngitsoortumik pinngitsaaliisummik utertitsineq, pinngitsaaliisummik katsorsaaneq, § 17 naapertorlugu angerlartitaareersumik pinngitsaaliisummik malittarinneq, nukersorfiginnineq, napparsimasoq illersorniarlugu pinngitsaaliisummik aalaakkiineq, nal. ak. 24-it sinnerlugit ataannartumik immikkut nakkutilliineq, matunillu parnaarsineq pillugu maalaarutit, napparsimavimmi pisortanit Tarnimikkut Nappaatillit Maalaarutaannik Aalajangiisartunut ingerlateqqinneqassapput.

*Imm. 2.* Nammineersinnaajunnaarsitaanerup allatulluunniit pinngitsaaliisummik iliuuseqarfigineqarnerup atorunnaarsinneqarneraniit qaammatit arfinillit qaangiutsinnagit, iliuuseqarfiginnineq pillugu maalaarut, napparsimasumit siunnersortaanilluunniit saqqummiunneqassaaq.

§ 43. § 42 naapertorlugu maalaarutaasoq Tarnimikkut Nappaatillit Maalaarutaannik Aalajangiisartunut saqqummiunneqarpat, allattugaatit suliamut tunngassutillit, pinngitsaaliilluni iliuutsinut nalunaarsuivimmi nalunaarsukkat assilineqarnerat Dronning Ingridillu Napparsimavissuani tarnimikkut nappaatilinnut immikkoortortaqarfimmi nakorsaanerup oqaaseqaataa ilanngullugit, Peqqissutsimut Pitsaaliuinernullu Aqutsisoqarfiup nassiutissavai. Tamatuma saniatigut Aalajangiisartoqatigiit paasissutissat allat pissarsiariniarnissaat namminneq isumagissavaat kiisalu oqaaseqaatinik assigisaannillu allanik pissarsiniarnissaq aalajangiivigissallugu.

*Imm. 2.* Napparsimasup siunnersortaatalu oqaaseqarnikkut imal. qarasaasiaq atorlugu attaveqatigiinnikkut maalaarummik saqqummiussinissaq pisinnaatitaaffigaat. Immikkut pisoqartillugu, napparsimasup peqqissusaata sulialluunniit Aalajangiisartunit ingerlanneqarnissaa eqqarsaatigalugu pisariaqarluinnarpat, napparsimasup tamakkiisumik ilaannakortumilluunniit isumaqatigiinniarnerni peqataannginnissaa alajangiivigisinnavaat.

*Imm. 3.* Pinngitsaaliisummik iliuuseqarfigineqarneq pillugu maalaarutit § 39, imm. 3 naapertorlugu, Tarnimikkut Nappaatillit Maalaarutaannik Aalajangiisartut naliliinissaasa tungaannut pinngitsaaliisummik iliuuseqarnissap kinguartinneqarsinnaasut, maalaarutip tighuneraniit ullut arfineq marluk qaangiutsinnagit Tarnimikkut Nappaatillit Maalaarutaannik Aalajangiisartut aalajangiivigissavaat. Maalaarutit allat Tarnimikkut Nappaatillit Maalaarutaannik Aalajangiisartut sapinngisamik piaarnerpaamik

aalajangiivigisavaat. Maalaarutip tiguneraniit ullut 14-it qaangiunneranni aalajangiisoqarsimanngippat, Aalajangiisartut tamatumunnga patsisaasumik qaqugulu aalajangiisoqarnissaata naatsorsuutigineqarnera pillugit, napparsimasoq siunnersortaalu ilisimatissavaat.

*Imm. 4.* Tarnimikkut Nappaatillit Maalaarutaannik Aalajangiisartut suleriaasissaannik Naalakkersuisut aalajangersaassapput.

**§ 44.** Napparsimasup siunnersortaataluunniit noqqaassuteqarneragut, pinngitsaaliisummik unitsitaaneq, pinngitsaaliisummik tigummigallagassanngortitsineq, uninngavimmut utinngitsoortumik pinngitsaaliisummik utertitsineq, pinngitsaaliisummik katsorsaaneq, § 17 naapertorlugu angerlartitaareersumik pinngitsaaliisummik malittarinninneq, nukersorfiginninneq, napparsimasoq illersorniarlugu pinngitsaaliisummik aalaakkiineq, nal. ak. 24-it sinnerlugit ataannartumik immikkut nakkutilliineq, matunillu parnaarsineq pillugit aalajangikkat, Kalaallit Nunaanni eqqartuussisaaseq pillugu inatsimmi kapitali 28-mi maleruagassat naapertorlugit, Tarnimikkut Nappaatillit Maalaarutaannik Aalajangiisartut aalajangiussatik eqqartuussivimmut tunniutissavaat.

*Imm. 2.* Tarnimikkut Nappaatillit Maalaarutaannik Aalajangiisartut napparsimasup nammineersinnaajunnaarsinneqarnissaa akuersissutigippassuk, aalajangiinnermiit qaammatit marluk qaangiunneranni aatsaat angerlartitaasinnaanermut apeqqut Tarnimikkut Nappaatillit Maalaarutaannik Aalajangiisartuni aalajangiivigisassanngorteqqinneqarsinnaavoq. Nammineersinnaajunnaarsitsinerup inatsisinut naapertuuttuunera pillugu apeqqut, imm. 1 naapertorlugu eqqartuussivikkut aalajangiivigisassanngortinneqarsimappat, killiliussaq eqqartuussiviup aalajangiinneraniit naatsorsorneqassaaq.

*Imm. 3.* Tarnimikkut Nappaatillit Maalaarutaannik Aalajangiisartut § 17 naapertorlugu angerlartitaanermut atatillugu pinngitsaaliisummik malittarinninnissaq akuersissutigippassuk, angerlartitaanermut atatillugu pinngitsaaliisummik malittarinninnissaq § 17 imm. 6 naapertorlugu sivitsorneqarpat aatsaat, Aalajangiisartunit aalajangiivigisassanngorteqqinneqarsinnaavoq. Tamatuma kingorna angerlartitaanermut atatillugu pinngitsaaliisummik malittarineqarnerup sivitsorneqarneri tamaasa, aalajangiivigisassanngorteqqinnissaa noqqaassutaasinnaavoq.

## **Kapitali 12**

*Atuutilersitsineq, ikaarsaarnermut atatillugu aalajangersakkat assigisaallu*

**§ 45.** Inatsit juulip aallaqqaataani 2013 atuutilersinneqassaaq tamatumalu kingorna aalajangikkanut atuutsinneqassalluni.

*Imm. 2.* Tamatuma nassatarisaanik tarnimikkut nappaatillit napparsimavimmi uninnganerat pillugu inatsit nr. 118 apriliip 13-ani 1938-imeersoq atorunnaarsinneqassaaq.

*Namminersorlutik Oqartussat ulloq 3. december 2012*

Kuupik Kleist

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut